

四庫全書

集部

欽定四庫全書

集部

晦庵集卷八十四

詳校官庶吉士臣朱理

主事臣呂雲棟覆勘

總校官庶吉士臣倉聖脉

校對官中書臣葉蘭

謄錄監生臣張元任

欽定四庫全書

晦庵集卷八十四

宋 朱子 撰

跋

跋趙鈴轄墓誌

先王封建子弟蕃屏王室所以厚人倫而寧天下非獨私其為力於已而已下及漢晉莫不由之雖其治亂得失有不齊者然要為宗社久長之計也唐自明皇疑忌諸王不令出閣後遂相踵以為家法是以享有天下餘

三百年而其子孫絕無聞於今者然則神祖之出宗支以仕州縣其所以法前聖而鑒後王者聖謨遠矣以故靖康之禍近屬雖頗北遷而疏遠在外者往往能建勲績其抗羣盜拒仇敵而死其官守者亦不乏人若江東鈐轄趙公是已其孫崇遵出此軸以見示因得反復諸公所記并感前事為太息而書其後獨恨東萊呂舍人所撰碑銘今不復存當為求之其家以附益之又記頃年守潭考其祀典有紹興初年死難之士四人其一兵

官趙侯聿之亦宗室子城陷巷戰罵賊而死寇退事聞
詔贈右監門衛將軍然皆未有廟貌而寓祭他所因竊
仰歎而深悲之即教綱紀并晉故刺史譙閔王等立象
奉祠而為請於朝不旬日間即蒙報可賜其號曰忠節
之廟德意所加神人歆動非獨諸君之靈為有歸也今
聞鈐轄諸孫且將自列求所以易其名者以熹所為請
額之事推之竊計厚骨肉之恩崇節義之勸聖朝於此
正有所不宜吝也譙王亦晉宗室事具本傳云慶元丙

辰七月庚子具位朱熹謹書

跋劉雜端奏議及司馬文正公帖

士大夫出身事主上則欲致其君為堯舜之君下則欲使其民為堯舜之民至於諫不行言不聽而潔身以去豈其心之所樂哉是以雖聖賢之處此不免遲遲其行而不忍為苟去甚或眷戀徘徊三宿而後出境其於君臣大倫恩義之際篤矣固不以苟得一時之虛譽為喜而輕去之也今觀熙寧雜端劉公之奏議知其致君澤

民之願勤懇切至不啻其身之疾痛觀司馬文正公之遺帖見其忠君愛國而相勉以正之意又不勝其拳拳也嗚呼盛哉然而道勝名立之言或者猶竊病之以熹而慮彼蓋有激而云爾不然夫豈不知既有其實則名自隨之在我固有不得辭者而當時風俗之厚習尚誠慤亦不以是為嫌也又况忠賢去國一時之心固不能無慨然者同志之士憂之過甚恐其以是而不能鬱鬱以久也則姑為是說以寬譬之是乃忠君愛國之尤者

而猶深有望於他時也豈以近名為累而故為回隱以避之哉劉公之事紹興大叅晉陵張公記之已詳一時衆賢又從而推明之亦皆足以見其鄉慕之意矣公之闕世孫君房又出以示熹使得託姓名焉自惟晚出何敢復贊一詞於其間特因或者所疑而妄論之以附于後云慶元丙辰八月戊申朔朱熹

跋張忠確公家問

熹嘗銘張忠文公之廟因得讀其遺書而歎慕其風烈

今又得觀公子忠確公汾州家問尤深敬仰竊惟國家
承平百年德隆澤茂世臣喬木不為無人而一旦危難
之際忠義之節乃獨萃於張氏之一門其亦盛矣公之
大節如青天白日固不待贊述而后明而熹獨於其筆
札之精謹見其神氣之安閒於其家人父子之間見其
誓死之外唯以收卹遺孤為寄而無一毫內顧下流之
私也嗚呼非其胸中有以大過人者何以及此先覺有
言慷慨殺身者易從容就義者難若公之死其真所謂

從容就義者邪公孫行儉因友人余克忠以此軸見視
三復以還為之感涕因敬識其後云慶元丙辰十月已
巳

跋東陽郭德輔行狀

東陽郭君德輔將葬其子淇不遠數百里過予於建溪
之上狀其行事一通以請銘而令四明帥守林公和叔
前太府丞呂君子約又皆以書來言君之為人如狀不
誣可銘無愧也予雖不及識德輔然以二君子之言而

讀其狀見其好學樂善之誠忠厚廉退之實心固樂為
之書顧念比以多病心目俱衰凡銘之請所諾而未及
償者前後以十數所辭而不敢諾者又不止此今復安
敢越次開端以來怨詈因謝不能而淇請益堅予悲其
意乃為書其行狀之後如此而歸之抑林呂二君子皆
非輕許人者其言固足以信後世矣又何竦於予銘哉
慶元二年九月丁丑朔旦新安朱熹書

跋許侍郎詩卷

侍郎許公經事綜物之才見於已試其為文章蓋直吐
出胸中之蘊未嘗屑屑焉為如是之言也其孫建陽丞
公視熹以公手書詩卷觀其長篇大句固自雄健豪逸
磊落驚人而新宅書懷近體諸作又皆律切精穩不留
縫罅亦足以驗其才力之有餘無所施而不可矣熹與
公俱江東人所居徽饒之間相望不百里獨恨生長閩
嶠不及識公顧今如此迺獲窺其筆蹟而因以得其為
人豈非幸耶慶元丙辰十月丙午朔旦婺源朱熹書

書河圖洛書後

世傳一至九數者為河圖一至十數者為洛書考之於古正是反而置之予於啓蒙辨之詳矣讀大戴禮書又得一証其明堂篇有二九四七五三六一八之語而鄭氏注云法龜文也然則漢人固以此九數者為洛書矣閻皂甘君叔懷欲刻二圖山中覽者未必深考又當大啟爭端聊書以識之慶元丁巳上元節日遜翁書

跋萬君行事後

自鄉舉里選之法廢取士者先文藝後材實於是野多遺賢朝多曠位而治具民俗每不能無愧於前世讀正父所論著其舅氏萬君之行事而以視於當世之人材其亦足以觀矣正父好古多學深有志於治道而其筆力從橫詞氣雅健又如此亦所謂似其家姓者耶

跋呂范二公帖

後山談叢記蘇端明當國恤時與人書疏疑於當慰與否而罷乃載前輩往還慰狀以正之今觀呂正獻公帖

乃知當時此禮固已通行亦臣子之心不能已者不審
蘇公何所疑也仁宗皇帝慈儉之德冠冕百王而因山
之奉煩費若此豈其心哉宜乎老蘇先生有華元樂舉
之譏而忠獻韓公不敢辭其責也然此帖所云置司裁
損仍是韓公當國時事亦足以驗其悔悟之實矣此其
所以為韓公者耶呂公幅紙之間愛君及民拳拳不舍
其於劉公心期所會必有不約而同者覽之令人感歎
不能已范忠宣公平淡忠恕雅不欲以智名勇功自見

故熙豐間授鉞臨邊數被譙讓觀第二帖可槩見矣然
迹其平生排濮議爭新法干忤君相無少顧避最後論
棟元祐諸賢卒與同貶蓋終身無所屈則又豈非所謂
仁者之勇哉其於劉氏姻好綢繆蓋亦聲氣之同非苟
然者子夷得其家學之傳不卑小官直道自信東萊呂
舍人亟稱之覽者其亦考焉慶元丁巳中元節前二日
朱熹敬書

跋度正家藏伊川先生帖後

頤謹詣行館拜謝長官秘書十月日河南程頤狀
正為遂寧戶掾友人王君世廬數數為正言城西
傅君光家藏先正韓范諸公手蹟甚富迺祖大夫
公嘉祐初實見濂溪周先生于合陽求教先生手
書家人艮遇等說贈之其後程太中公知漢州大
夫公時為邑西川又得交伊川兄弟間手筆相問
往往皆在正每見王君必悉意咨懇屬以訪求周
程諸先生手蹟慶元二年正月四日王君忽自山

中來謁講禮已袖出伊川先生手狀一幅徐加考
訂殆先生入蜀時筆也大夫公集以為日記冊此
版起六月終七月十六日內載王氏父子呂氏兄
弟遷擢蓋熙寧間日報作細字背面皆滿先生字
處闕之獨得不謾又問濂溪書曰亡矣正且悲且
喜謂王君曰正不敏讀諸先生遺書學其學求其
道今十年餘矣每見當時一事一物如南國之棠
曲阜之履旁皇不忍去之也今此紙幸脫於敗爛

之中然諸先生所以開示後世者世方以為奇貨
安知叔孫武叔輩見之不遂投之水火耶為我謝
傅君正奉藏之俾勿壞其年秋傅君來言曰先生
之書謹如命大夫公諱者字伯壽名在元符黨籍
光字用之世廬字叔載後學樂活度正謹書

傅君周旋周程師弟子間知所主友而伊川先生手刺
謁謝為禮亦恭則其人之賢不問可知度君求訪之勤
意欲甚美濂溪先生往還遺蹟計其族姻閭里之間猶

有存者度君其廣詢之當可得也嘗讀明道先生顏樂
亭詩其卒章曰井不忍廢園不忍荒嗚呼正學其何可
忘然則熹之所望於度君者又不專在於此也度君其
益勉之哉慶元丁巳七月二十二日朱熹書

跋張敬夫與馮公帖

此張敬夫與縉雲馮當可書也味其詞意知其一時家
庭之間定省從容未嘗食息不在中原之復令人感慨
不已馮公獨不及識然嘗見故端殿汪公甚推重之近

得其文集讀之論議偉然而所論人主正心親賢為所謂建極者明禹箕之傳破諸儒之陋乃適與鄙意合尤恨不得一見其面目而聽其話言也慶元丁巳七月二十五日新安朱熹書于建安坤峽之野店

跋孔君家藏唐誥

闕里裔孫孔仲良以鄉貢明經仕唐正元大和間至莆田令卒官因家焉子孫散居民伍無復顯人紹興中熹之友括蒼吳任授室其門間以其家所藏告身家牒世

譜相視皆唐世舊物牒又其應舉時所通具列三世官
諱獨曾祖文整名見譜中乃襲文宣王齊卿之別子而
齊卿實先聖第三十有七世孫也考之元豐版本襲封
家譜皆合推而下之得莆田令君則為第四十有一世
矣牒頗殘缺無州里而以洪州之印款其縫視其告則
以為泗州連水縣臨淮鄉進賢里人豈其寓於洪耶告
身凡七通其二為令君之父丞公所歷南頓溧水二縣
尉其五為令君明經冬集全椒尉青陽丞及莆田考課

皆尚全好獨莆田令為謄本而其家自令君至此又已
傳九世矣熹得其書審訂不謬乃以告於莆守傅侯自
得令丘君鐸請得更其版籍為至聖文宣王第四十九
世孫孔宜戶二公欣然許諾即施行之時紹興二十五
年乙亥歲也後二十有六年宜之子幼夏乃以鄉舉試
禮部又數年知縣事廖德明為摹刻其告於縣齋然其
跋語以令君為三十八世則為小差幼夏以其墨本來
因記舊事輒為書之且使摹其家譜世譜及南頓溧水

二告并刻于家而附以令君以來世次之屬使後有考云慶元丁巳中秋日朝奉大夫朱熹書

跋孔毅夫談苑

孔毅夫談苑清江張元德藏其手稿然多是抄取江鄰幾嘉祐雜志中語此本方是一傳以失校已多脫誤又世傳孔書有珩璜新論者多是類集古今事實之近似者而一本附記近世見聞數十事自趙獻公以下無不遭其詆毀嘗細考之筆勢不甚相似或好事者附益之

惑亂後生甚可惡也因閱此帙筆其後以曉之慶元丁巳八月晦翁

跋十七帖

官本法帖號為佳玩然其真偽已混殺矣如劉次莊有能書名其所刻本亦有中分一字半居前行之底半處後行之顛者極為可笑唯此十七帖相傳真的當時雖已入官帖卷中而元本故在人間得不殺亂此本馬莊甫所摹刻也玩其筆意從容衍裕而氣象超然不與法

縛不求法脫真所謂一一從自己胸襟流出者竊意書家者流雖知其美而未必知其所以美也書詞問訊蜀道山川人物屋宇圖畫至纖至悉蓋深有意於遊覽而竟不遂豈所謂不朽之盛事信難偶耶因念頃年廬阜終更諸公議遣使蜀而孝廟記憐不欲使之遠去議乃中寢然東留訖無補報而徒失西遊之便每以為恨今觀此帖重以慨然又念優遊之日遠無復有意於人世也熹記

跋杜工部同谷七歌

杜陵此歌豪宕奇崛詩流少及之者顧其卒章嘆老嗟
卑則志亦陋矣人可以不聞道哉

跋李伯時馬

觀龍眠飛騎圖及讀延之廷秀大防三君子佳句因思
法雲秀公語尤物移人甚可畏也慶元三年孟冬八日
朱熹仲晦父

跋東坡書李杜諸公詩

東坡此卷考其印章乃紹興御府所藏不知何故流落人間捧玩再三不勝敬歎但其所寫李白行路難闕其中間八句道子胥屈原陸機李斯事者此老不應有所遺忘意其刪去必當有說老翁并詩在老蘇送蜀僧去塵之前必非他人之作然不見於嘉祐集亦不省其何說也彼欲并中老翁改顏易服不使人知而後篇遽有嫌瘦廢彈之嘆何耶然其言怨而不怒獨百世以俟後賢而不惑則其用意亦遠矣哉慶元丁巳十月丁丑新

安朱熹觀玉山汪季路所藏而識其後如此云

跋杜祁公與歐陽文忠公帖

杜公以草書名家而其楷法清勁亦自可愛諦玩心畫如見其人慶元丁巳十月丁丑新安朱熹觀

跋東方朔畫贊

平生所見東方生畫贊未有如此本之精神者筆意大緊與賀捷表曹娥碑相似不知何人所刻石在何處是可寶也朱熹仲晦父

跋蔡端明寫老杜前出塞詩

蔡公大字蓋多見之其行筆結體往往不同豈以年歲有蚤晚功力有淺深故耶巖壑老人多見法書筆法高妙獨稱此為勁健竒作當非虛語慶元三年十月戊寅朱熹

巖壑再題勢若飛動可見字隨年長也

跋吳道子畫

頃年見張敬夫家藏吳畫昊天觀壁草卷與此絕相類

但人物差大耳此卷用紙而不失色又有補畫頭面手足處應亦是草本也張氏所藏本出長安安氏後有張芸叟題記云其兄弟析產分而為二此特其半耳頃經臨安之火今不知其存亡而此卷斷裂之餘所謂天龍八部者亦不免為焦頭爛額之客豈三災厄會仙聖所不能逃耶是可笑也吳筆之妙冠絕古今蓋所謂不思不勉而從容中道者茲其所以為畫聖與季路所藏法書名畫甚富計無出其右者既以得觀為幸因記歲月

於其後時慶元丁巳十月十日己卯也朱熹仲晦父
襄陽張舍人筆法出其家存誠子先君子甚愛之
而世莫之貴也因覽遺墨不勝悲歎熹謹書

跋歐陽文忠公與劉侍讀帖

歐陽公與劉侍讀尺牘一卷汪季路持以見示因得竊
觀前輩之笑談風味於此猶可想見其彷彿然當是時
朝廷清明風俗醇厚國家致治之美莫此為盛而公猶
有薄惡之歎蓋其所不可及者獨有嫉善之言不勝公

論此為治亂之分耳三復之餘掩卷太息而記其後季路其謹藏之慶元三年十月己卯書

跋舊石本樂毅論

沈存中筆談云皇祐中嘗於高紳之子錢塘主簿安世家見此石後十餘年安世在蘇州石已破為數片以鐵束之後安世死石不知所在或云蘇州一富家得之亦不復見存中所記與歐陽公不同如此延之所謂錫山徐氏者豈又得之蘇州富家耶延之又謂損泐糝糊則

石雖幸存亦無復如此本之清勁矣續閣帖中所刻全文又不知所自來頃年曾於折子明家見其所藏舊本筆意絕類徐季海要皆非此本之比也慶元丁巳十月己卯朱熹

跋東坡祭范蜀公文

汪季路所藏蘇文忠公祭范忠文公文稿慶元丁巳十月己卯朱熹觀于考亭溪居

跋富文忠公與洛尹帖

富文忠公與洛尹帖以史考之尹者李中師也熙寧元年公自河陽被召入京以病請汝而歸過洛少留連遭

三喪赴汝後又一遭喪

劉子云喪骨肉大小四口

是時李以天章閣

待制知河南府營奉應天會聖兩神御殿故此一帖自言附庸悲惱而贊李二役畢工者為第一公既至汝神廟遣中貴人馮宗道挾太醫陳易簡來治足疾故此一帖言中璫太醫者為第二移囚不知何事馮來恐亦即宗道也故此帖為第三明年被召入相故此一帖云詔

使到郡即交州事辦行而東者為第四三年李自權三
司使進龍直再尹洛故此帖致賀始稱龍圖給事者為
第五四年公在亳州坐不散青苗罷歸洛未至改判汝
州故此一帖言近赴小邑勝於窮坐里閭且感君相厚
恩而恨不得時奉談笑者為第六公至汝不久即請歸
洛故此一帖言擇日就第者為第七既而告老遂以司
空使相致仕故此一帖答其封示單報者為第八凡十
三帖其歲月先後可考者如此其餘似亦皆是在洛時

往還者蓋李之事公不為不謹而公之遇李亦不為不厚矣而其後李因奉行免役之令乃籍公戶使出泉同於編氓以媚用事者小人觀時徇勢反覆異態何世無之覽此卷者可為發一大笑也慶元丁巳十月庚辰朱熹

跋韓魏公與歐陽文忠公帖

張敬夫嘗言平生所見王荆公書皆如大忙中寫不知公安得有如許忙事此雖戲言然實切中其病今觀此

卷因省平日得見韓公書蹟雖與親戚卑幼亦皆端嚴
謹重略與此同未嘗一筆作行草勢蓋其胸中安靜詳
密雍容和豫故無頃刻忙時亦無纖芥忙意與荆公之
躁擾急迫正相反也書札細事而於人之德性其相關
有如此者熹於是竊有警焉因識其語於左方慶元丁
巳十月庚辰朱熹

跋朱希真所書道德經

巖壑老人小楷道德經二篇精妙醇古近世楷法如陳

碧虛之相鶴黃長睿之黃庭皆所不及唯湍石喻公之
典引諸書為可方駕耳季路得之遠以相視恨目已昏
盲不得盡見其妙處把玩不足因記其後而歸之季路
能攻石傳刻以與好事者共之即大幸蓋此書難得善
本讀此數章似少譌謬又為可傳也慶元丁巳十月庚
辰雲臺子私記

如儼若容語意最精今本多誤作容殊失本指此
本為不誤也

跋趙清獻公家書

趙清獻公之為人公忠孝慈表裏洞徹固所謂無間然者然其晚歲學浮屠法自謂有得故於兄弟族姻之間無不以是勉之前後見其家間手帖多矣如此卷稱其弟心已明瑩見性復元教其姪以不失正念要使純一不雜又教以公私謹畏踐履不失便是初心佛事且引古人二業清淨即佛出世之語以為此亦直截為人處則與今之學佛者大言滔天而身心顛倒不堪著眼者

盖有間矣嗚呼聖學不傳其失而求諸野者若此尚為
有可觀也予是以表而出之慶元丁巳十月十一日庚
辰朱熹書

跋湯叔雅墨梅

墨梅詩自陳簡齋以來類以白黑相形逮其末流幾若
禪家五位正偏圖一矣故湯君始出新意為倒暈素質
以反之而伯謨因有冰雪生面之句也然白黑未分時
一句畢竟未曾道著詩社高人試各為下一轉語看湯

君自云得其舅氏楊補之遺法其小異處則又有所受也觀其蘊藉敷腴誠有青於藍者特未知其豪爽超拔之韻視牢之為何如爾病眼眇昏不能覈論故願與諸君評之戊午三月病起戲書

跋王信臣行實

慶元紀號之初余友呂子約謫居廬陵間遣詢其動息子約報書具言罪大責輕念咎之餘復何所道獨所寓居得王氏別館有臺榭花木之勝而江山雲物晨夕萬

變足以遊目騁懷尤過望不落寔耳因極道王君之為
人以為好賢樂善所交盡其鄉之名公卿才大夫又能
同其憂樂不隨世俗為俛仰既又以書來稱王君之子
峴為方有意於學謂余當有以告語之者峴亦以書來
贄甚勤余讀之信子約之言不誣也無幾時子約內徙
高安以卒而峴亦以王君之沒來赴且述其事狀一通
而以銘墓為請余病疾久廢筆研既弔且謝不能而峴
請益堅乃記其後而歸之以見余意又以見峴之狀君

詞有不盡而無所溢也四年戊午中冬丙申朔旦雲谷
老人朱熹仲晦父書

跋程沙隨帖

離騷九章云乘鄂渚而反顧兮欸秋冬之緒風說文欸
鷹也亞改切又焉開切史記范增撞破玉斗曰唉說文
唉鷹也烏開切二字音義並同如歎與嘆欸與咳實一
字耳其聲則皆楚語也故元次山有欸乃曲而柳詩亦
用此二字皆湘楚間作柳文舊本作靄襖音上字正協

亞改之聲集韻亦於皆韻收唉字海韻收欸唉二字為
一其說蓋與說文不異但乃字之讀如襖者未有考耳
近世乃有倒讀之者又或寫欸為欵則其誤益甚矣乃欵

歌○唐肅宗中興之業上比漢東京固有愧而下方晉

元帝則有餘矣故許右丞之言如此蓋亦有激而云者
然元次山之詞歌功而不頌德則豈可謂無意也哉至
山谷之詩推見至隱以明君臣父子之訓是乃萬世不
可易之大防與一時謀利計功之言益不可同年而語

矣近歲復有謫子妄為刻畫以謗傷之其說之陋又許

公所不道直可付一笑云

語溪詩

○顏公剛毅忠烈得之

天資與其學之不純而諂道佞佛自不相掩有志於道者師其所當師而戒其所可戒可也淺聞卑論易以溺

人不足為法覽者詳之

麻姑山詩

○余少嘗學書而病於腕

弱不能立筆遂絕去不復為今觀沙隨程丈此卷饒娥

一紙盖有意於黃絹之碑者亦可愛也饒娥故居小廟

在樂平縣東二十餘里余嘗特往沃茗酌之靈闕已不

復存矣因語州縣宜增葺之且為請敕額列祀典而莫
有應者甚可歎也

辨饒娥

○余嘗為沙隨言孝經獨篇首

六七章為本經其後乃傳文然皆齊魯間陋儒纂取左
氏諸書之語為之至有全然不成文理處傳者又頗失
其次第殊非大學中庸二傳之儔也程丈報書云吾嘗
聞之玉山汪公亦若吾子之言是也今覽其手書遺論

因記其語於後云

孝經論

慶元戊午十一月二十六日劉用之為劉伯醇攜

此卷來求跋為書以歸之

書釣臺壁間何人所題後

此詞實亦先生所作

不見嚴夫子寂寞富春山空留千丈危石高出暮雲
端想象羊裘披了一笑兩忘身世來插釣魚竿肯似
林間翮飛倦始知還中興主功業就鬢毛斑驅馳一
世人物相與濟時艱獨委狂奴心事未羨癡兒鼎足
放去任疎頑爽氣動星斗終古照林巒

頃年屢過七里灘見壁間有胡明仲丈題字刻石拈出

嚴公懷仁輔義之語以厲往來士大夫未嘗不為之摩
娑太息也然亦不能盡記其語後數十年再過因覓其
石則已不復存意或者惡聞而毀滅之也獨一老僧年
八十餘能誦其詞甚習為予道之俾書之冊比予未久
而還則亦為好事者裂去矣因覽兩峰趙俛醉筆釣臺
樂府偶記向所嘗見一詞正與同調并感胡公舊語聊
為書此慶元己未人日雲谷老人云

釣臺故有范公記文詞義甚偉後人不容復措手矣中

間有江子我一記獨書作新歲月最為得體而粗述其以羊裘題軒客星命閣之意名義亦為高雅今屢經火不知此石尚存否也近年乃有作記力辨嚴公非詭激素隱者蓋邵康節作安樂窩中好打乖詩明道程先生和之曰時止時行皆有命先生不是打乖人而康節又復之乃有安知不是打乖人之句此言有味也使嚴公而可作當為此發一大笑云

跋呂氏歲時雜記

右呂公歲時雜記熹得而伏讀之既於周退傳陸放翁之所嘆竊亦深有感焉又意公之為此亦前賢集錄方書之遺意也然則後之君子又將有感於余言也夫慶元己未二月辛巳新安朱熹書

跋張安國帖

安國天資敏妙文章政事皆過人遠甚其作字多得古人用筆意使其老壽更加學力當益竒偉建陽張大夫珍藏此紙間以視予展玩恍然如接談笑書其後而歸

之慶元己未三月八日

跋山谷宜州帖

山谷宜州書最為老筆自不當以工拙論但追想一時
忠賢流落為可歎耳雲谷老人因覽竊識慶元己未三
月八日

跋米元章下蜀江山圖

米老下蜀江山嘗見數本大畧相似當是此老胸中丘
壑最殊勝處時一吐出以寄真賞耳蘇文粹中鑒賞既

精筆語尤勝頃歲嘗獲從游今觀遺墨為之永嘆慶元
己未三月八日新安朱熹仲晦父

跋蔡端明帖

蔡公書備衆體此卷評書一紙獨有歐虞筆意甚可愛
也慶元己未三月八日雲谷老人觀縣大夫張侯所藏
為識其後

跋歐陽文忠公帖

歐陽文忠公與蔡忠惠公手帖前輩交情篤厚語意真

實於此可見慶元己未三月八日新安朱熹仲晦父書

跋東坡帖

東坡筆力雄健不能居人後故其臨帖物色牝牡不復可以形似校量而其英風逸韻高視古人未知其孰為後先也成都講堂畫象一帖蓋屢見之故是右軍得意之筆豈公亦適有會於心歟慶元己未三月八日朱熹仲晦父觀永福張氏所藏墨蹟歎賞不足因記其左方

跋曾南豐帖

余年二十許時便喜讀南豐先生之文而竊慕效之竟以才力淺短不能遂其所願今五十年乃得見其遺墨簡巖靜重蓋亦如其為文也慶元己未三月八日

跋彭監丞集

余頃使浙東時諸郡民以保伍之役不便相與自言者衆獨台之臨海為無有問其故則曰前此縣令彭君視其聚落之貧富而稍正定其疆理使貧里得免頻役之苦以故皆樂趨事無所為訴余念聚落貧富之不均最

為役法大害間者雖設歇役年歲倍半之差而猶有所不通令彭君所行雖律令所無有然亦非有禁也真可謂得法外意矣間頗推其法於他郡縣人果皆以為便後以按事至台留甚久聞臨海士民稱彭君之政不容口曰吾邑數年之前唯顏侍郎度為有去思而近歲乃得彭君其惠愛惻怛酷相似而綜理詳密殆過之既又得其所為戶口財賦之書讀之益知彭君之志不但為百里規模而已也然余自是罷歸不復出者累年亦聞

彭君登朝出守持使者節而竟不及試以卒每深以為恨也慶元己未君之中表林生補持此集及葉卿所撰墓銘過余三復感歎因書疇昔所聞以附焉以為有志於民者尚有取也三月丁丑既望新安朱熹

跋劉司理行實

長樂劉砥及其弟礪相與來學累年于茲更歷變故志尚愈堅察其居家孝友交朋友信實臨事謹畏不敢畔繩墨知其教習之有素也一日出友人趙君昌父所狀

其先府君行事一通因以銘墓為請余讀其文考其事
有以信余所知之不謬矣然余久以疾病憂畏不能文
比年以來所辭且十數家以故雖知劉君之賢而不能
有以少答二生之意獨識其後而歸之後有君子尚有
以識此心也雖然二生勉旃尊聞行知而有以卒就其
德業則所以顯揚其親者於是為大銘之有無初不足
為重輕也慶元己未四月乙酉新安朱熹書

跋家藏劉病翁遺帖

病翁先生壯歲棄官端居味道一室蕭然無異禪衲視世之聲色權利人所競逐者漠然若亡見也熹蚤以童子獲侍左右先生始亦但以舉子見期而熹竊窺觀見其自為與所以教人者若不相似暇日僭有請焉先生欣然嘉其有志始為開示為學門戶朝夕誨誘亶亶不倦其後先生屬疾熹適行役在外亟歸省問先生喜甚顧而語曰病中無可與語幸吾子之來歸也自是日奉湯藥先生所以教詔益詳期許益重至為具道平生問

學次第傾倒亡餘一日從容因出詩一篇見授先生性
不喜書常時詩文率多口占使諸生執筆獨此與贈劉
致明文長句皆手書之其意可見也

贈別詩有小兒清
香慰臨別極知了

了萬緣輕之句子姝或惡其語之不祥者先生笑
曰此何足諱然亦為汝更之因別定為愁絕字

既又

發故篋得碎紙數十皆平日省躬自厲之言稍以先後
次為一篇命熹與同舍生黃銖筆之復取閱視手自更
定數十字間不一日遂啓手足諸子姝乃共發其先所
緘封遺書數幅皆熹未歸時所留處畫庶事遍及遺孤

復有片紙屬熹為作張公書末有勉力大業之語熹始
得泣受而寶藏之以至于今不敢失墜然而躬行不力
老大無成不能有以仰副當日付授之意抱此愧恨每
念將無以見先生於地下今病已力何所復云姑取遺
墨聯為一編而序其本末以示子孫且以示諸同志使
於前修景行之懿知所跂慕而又視熹之慵惰亡聞以
為前車之戒也熹字元晦亦先生所命其祝詞具在以
非臨終手筆別附他卷先生沒以紹興十七年丁卯後

五十三年慶元己未五月丙申門人朱熹謹書

跋病翁先生詩

月高夜鳴箏聲從綺窗來隨風更迤遞縈雲暫徘徊
餘音若可玩繁弦互相催不見理箏人遙知心
所懷寧悲舊寵棄豈念新期乖含情鬱不發寄曲
宣餘哀一彈飛霜零再撫流光頽每恨聽者稀銀
甲生浮埃幽幽孤鳳吟衆鳥聲難諧盛年嗟不偶
況乃容華衰道同符片諾志異勞事媒栖栖牆東

客亦抱凌雲才

此病翁先生少時所作聞箏詩也規模意態全是學文
選樂府諸篇不雜近世俗體故其氣韻高古而音節華
暢一時輩流少能及之逮其晚歲筆力老健出入衆作
自成一家則已稍變此體矣然余嘗以為天下萬事皆
有一定之法學之者須循序而漸進如學詩則且當以
此等為法庶幾不失古人本分體製向後若能成就變
化固未易量然變亦大是難事果然變而不失其正則

縱橫妙用何所不可不幸一失其正却似反不若守古
本舊法以終其身之為穩也李杜韓柳初亦皆學選詩
者然杜韓變多而柳李變少變不可學而不變可學故
自其變者而學之不若自其不變者而學之乃魯男子
學柳下惠之意也嗚呼學者其毋惑於不煩繩削之說
而輕為放肆以自欺也哉己未五月二十二日

書先吏部韋齋記銘并劉范二公帖後

右劍浦羅先生仲素為先君子作韋齋記而沙陽曹丈

令德又為之銘家藏遺蹟數十年矣恭惟先君子名齋之意不唯自警乃其所以垂裕後人者蓋亦至深至厚而無以加而熹踐修不謹陷身危辱今病且死大懼無以奉慈顏於地下故敢收輯遺文藏之家廟以示子孫使永永奉承不至失墜庶幾得以少伸省愆念咎之萬一其橫渠西銘寔外舅草堂劉先生所授首尾有先生手筆二十字造字祝辭病翁劉先生所作及祕閣范公手帖今皆以附于後三公皆先君子執友其所以教熹

者今皆不能有以副也慶元己未五月丙申孤熹敬書
書先吏部與淨悟書後

某啓比獲從容良慰北巖重勤遠出伏暑中時得
雨法體多福安下處未欲遽以干人須決成入城
即自有書信去城中數日人事紛紜歸來靜坐累
日意緒始復舊雲監寺不別書空石斗一枚付去
人謝諫去若借得兩人即分付兩籠令共舁來不
然即且取古田丙字紙五軸付謝諫來及拱首座

並煩致意未相見加愛閏月三日某啓上尊勝長老淨悟見世美兄弟致意城中滾滾不款未及為

書

先君子少日喜與物外高人往還而於淨悟師為尤厚後嘗為記尊勝佛殿今刻石具在可考也淨悟建陽後山人晚自尊勝退居南山雲際院一室脩然禪定之餘禮佛以百萬計年過八十目光炯然非常僧也常為余道富文忠趙清獻學佛事其言收斂確實無近世衲僧

大言欺世之病以是知先君子之厚之非苟然也古田
林生蒙正持此卷來捧玩手澤不勝悲感因為略記其
本末云慶元己未六月既望雲谷朱熹謹書

跋德本所藏南軒主一箴

敬之一字學者若能實用其力則雖程子兩言之訓猶
為刺語如其不然則言愈多心愈雜而所以病乎敬者
益深矣誦敬夫之箴者要當以識此意云慶元己未初
伏雲谷老人書

題吳和中感秋賦後

和中感秋作賦既發深省乃欲逃之麴蘖之間叔通以
碩果不食者厲之可謂得朋友之職矣顧予姦偽排擯
之餘何足知此二君子其相與切磋之時有以見警焉
則區區之望也慶元己未八月既望雲谷老人書

跋張以道家藏東坡枯木怪石

蘇公此紙出於一時滑稽詼笑之餘初不經意而其傲
風霆閱古今之氣猶足以想見其人也以道東西南北

未嘗寧居而能挾此以俱寶玩無數此其意已不凡矣
且不以視王公貴人而獨以誇於畸人逐客則又有不
可曉者雲谷老人因覽為識時慶元己未仲秋既望

愚叟之墓已有宿草矣撫玩遺墨相視感慨泣然
久之若歸羌廬以視西坡當同此嘆也

愚叟謂呂
子約晚謫

高安寓大愚寺自號大
愚老叟西坡謂黃商伯

跋劉子勉行狀

余自為童子時得見大夫公於病翁先生之側聞其自

誦所為程試之文意氣偉然音節華暢已知敬愛其人
後因葬親於公之鄉始得從公遊好款密見公居家居
鄉言之詳及聞其所以施於官政者表裏殫盡莫非
忠厚信實慈惠恭儉之意於是始益心服其為人及公
之沒其諸子示以此書蓋將使志其墓會余方有幽憂
之疾不遑序次然三復其文而參以平生所聞見蓋無
一詞之非實也顧念歲月逾邁後生之及見前輩者日
加少而俗愈媮也為之太息而識其後云新安朱熹書

跋吉水周君家藏訴牒

吉水鄉貢周君訴牒七通其家寶藏閱八世餘二百年矣覽者不暇尋其端原一旦丞相益國公表而出之為之稽考歲年推校事實上及正朔名諱至纖至悉於是周君之事得以備見其本末其後之人可以益嚴奉守而無所事於他求矣而其孫洽乃徧以屬其鄉黨知名之士悉使贅述而揄揚之是則已病於贅而意猶未已又復不遠千里夤緣紹介以諉於余此其為贅豈不又

甚矣余欲謝而却之又念無以答其累舍重趼之勤乃
書此以諗焉生其持歸杜門讀書求其所未學者以繼
乃祖之業毋庸復爾奔走請謁而求無所用之跋語以
老歲月為也噫若余之言固亦無所用者然使生因是
而有發焉則猶足為有用也夫慶元己未三月甲子新
安朱熹

跋山谷草書千文

李端叔崇寧三年八月一日題云紹聖中詔元祐

史官甚急皆拘之畿縣以報所問例悚息失據獨魯直隨問為報弗隱弗懼一時栗然知其非儒生文士而已也

紹聖史禍諸公置對之辭今皆不見於文集獨嘗於蘇魏公家得陸左丞畫一數條皆詆元祐語也其間記黃太史欲書王荊公勿令上知之帖而已力沮止之黃公爭辨甚苦至曰審如公意則此為佞史矣是時陸為官長以是其事竟不得書而黃公猶不免於後咎然而後

此又數十年乃復賴彼之言而事之本末因得盡傳於世是亦有天意矣惜乎秉史筆者不能表而出之以信來世而顧獨稱其詞筆以為盛美因觀此卷李端叔跋語為之感慨太息輒記其後若其書法則世之有鑒賞者自能言之故不復及云慶元己未十一月既望雲谷老人朱熹記

跋陳光澤家藏東坡竹石

東坡老人英秀後凋之操堅確不移之姿竹君石友庶

幾似之百世之下觀此畫者尚可想見也

跋陳大夫詩

常人之情小有一善則自視哆然若有餘而其責報也
歛然常若有所不足所以善日消而惡日長卒以陷溺
於利欲之橫流而不自知也大夫陳公廉靖自守不肯
屈意權門寧俯首於下寮終身而不悔比其晚歲僅以
年勞得官其世而所以省身知足之意見於短章者乃
如此其志念之所存與庸者遠矣嗚呼子孫之賢其亦

深念而敬守之也哉慶元己未十一月既望新安朱熹
識

跋進賢傅君行實

從政進賢傅君既沒將葬其子修抱其行實一通不遠
千里辱以顧予流涕言曰先人蚤歲有志功名之會中
間不幸遭罹國難蓋嘗解儒服以事戎行實從宣撫岳
公轉戰許洛之間屢以捷告上功未報而南北通和岳
公遂罹讒口失兵柄得奇禍先人為之感慨憤激棄其

官勲以歸故里復治家人生產作業教子讀書酌酒賦詩以自排適倏然不知其身之老也晚值慶恩三蒙錫命之寵遂易文階老壽康寧閭里嗟嘆今者不幸至於大故不肖之孤銜哀忍死以奉窆窆之事既有期矣顧恨未得當世之大人君子發其潛德之幽光傳之久遠以覆霑其後嗣是以匍匐而來再拜以請于執事惟公幸哀而與之銘則死者有知亦無恨於泉下矣予視其冠屨應禮而戚容與之稱言詞懇愨情旨酸辛為惻然

動心焉知其平日習於賢父兄之教訓也以是雖不及
識傳君而於此得其為人顧念罪戾之餘言語不足以
取重當世而疾病摧頽意緒荒忽亦無復心力可以治
筆研作文詞矣特以其遠來泣請之哀不可以不答也
因為書此于行狀之後使并以視來者云慶元己未十
一月辛丑新安朱熹書

跋大父承事府君行狀

右先大父贈承事郎府君行狀先君太史吏部贈通議

大夫君所撰也當時既以請銘於政和王簿盧君點未及礮石而羣盜蠶起文書散逸於今僅存半稿不可復刻矣熹竊惟念吾家自歛入閩而府君始葬於此不可使後之子孫不知其時世歲月與其所以積德垂慶開祐後人之深意敬立石表刻狀下方立于墓左先世墳廬在婺源者及祖妣孺人以下別葬所在亦具刻于碑陰使來者有考焉盧君字師予老儒博學清謹有馴行定宅者弋陽金生字確然亦廉節士頗通方外之學姓

字皆見先集云慶元五年十有二月甲子孝孫具位熹
謹記

跋楊子直所賦王才臣絕句

王摩詰輞川漆園詩云古人非傲吏自闕經世務偶寄
一微官婆娑數株樹余深愛之而以語人輒無解余意
者今讀子直此詩而於南谷之篇竊有感焉因識其後
復以寄才臣果以為何如也慶元庚申正月二十八日

晦翁書

楊詩曰南山高且明其下有深谷文豹識顯藏終朝霧如沐

跋黃壺隱所藏師說

盱江黃柟達材以其先君子壺隱居士手抄此冊見示乃熹昔年所受師說手書居前記錄在後伏讀愀然如復得侍坐左右而聞其緒言也顧恨慵惰不能拳拳服膺以報萬一而荒淺昧陋趣錄之際又不能無失其深微之意三復以還不勝悚愧然觀壺隱好學自強樂善

不倦乃至於此熹雖不及識面而於此亦足以窺其所
存矣因竊記其後而歸之達材昆弟其亦寶藏敬守精
究而勉學焉以無忘前人之訓慶元庚申二月八日新
安朱熹謹書

跋袁州萍鄉縣社倉記

萍鄉胡君安之來學於余一日致其鄉人士君子之意
欲余為之記其社倉之役及扣其詳則出是書一卷曰
此邑士鍾君詠之所為也是倉之成鍾君及彭君公脩

實有力焉故所登載詳悉如此余固嘉其敏於事而又能述以文也因念紹熙甲寅之歲赴鎮長沙道出茲邑邑之士子導余以觀於其學而請記之及行堂序間則既有亡友劉君清之之刻在焉余拱而讀顧而歎曰美哉乎子澄之言也諸君日誦而時省之則亦無以余言為矣即謝去不敢為而諸生至今猶有望於余也矧曰是倉之成既出鍾君之手而此文又出其筆則亦何以異於學之有記而復何待於余言哉又況天下之事是

非得失固有定在而其盛衰興廢亦有繫於時勢而不可常者顧余之衰謝淪落徒足以為是倉之累而不足以增其重諸君亦何所賴而求之若是其勤耶為諸君計莫若具刻鍾君之記以示後人使讀之者有以知其成之之不易如此而不忍壞焉斯亦足矣胡君告歸因跋其尾以授之且以寄謝庠序諸君使毋忘子澄之教也慶元庚申二月辛巳春分晦菴病叟朱熹書

跋周司令所藏東坡帖

蘇公翰墨為世寶藏故流俗多偽作者余家有其與德
叟先輩書兩紙詞意超然筆勢飛動觀者尚或疑之余
亦不能辨也今觀作肅所藏源流有自而二公賞識又
如此其亦可以無疑矣五月朔日朱熹云

跋章國華所集注杜詩

章國華過予山間出所集注杜詩示予其用力勤矣然
其所引東坡事實者非蘇公作聞之長老乃閩中鄭昂
尚明偽為之所引事皆無根據反用杜詩見句增減為

文而傳其前人名字託為其語至有時世先後顛倒失
次者舊嘗考之知其決非蘇公書也况杜詩佳處有在
用事造語之外者唯其虛心諷詠乃能見之國華更以
予言求之雖以讀三百篇可也朱熹仲晦書

題林汝器論語集說後

友人范百崇嘗為予言語孟聖賢之言本自平易又有
諸先生相為發明義理昭著如日星然學者體味於心
念念不已自然血脈通貫無所底滯然後可言有益於

吾身不然涉獵強記無沈浸醲郁之功則其所資亦淺
淺焉耳予愛其言因書於林汝器所編論語說後汝器
以此說驗之則其所編之是非得失當自見矣

題李太白詩

世道日交喪澆風變淳原不求桂樹枝反棲惡木
根所以桃李樹吐華竟不言大運有興沒羣動若
飛奔歸來廣成子去入無窮門

林光之攜陳光澤所藏廣成子畫像來看偶記太白此

詩因寫以示之今人捨命作詩開口便說李杜以此觀之何曾夢見他脚板耶

書周易參同契考異後

右周易參同契魏伯陽所作魏君後漢人篇題蓋放緯書之目詞韻皆古與雅難通讀者淺聞妄輒更改故比他書尤多舛誤今合諸本更相讐正其間尚多疑晦未能盡祛姑據所知寫成定本其諸同異因悉存之以備參訂云

題不養出母議後

禮不著嫁母之服而律令有之或者疑其不同以予考之禮於嫁母雖不言親而獨言繼又著出母之服焉皆舉輕以明重而見親母之嫁者尤不可以無服與律令之意初不殊也又於為父後者但言出母之無服而不及嫁母是亦舉輕以別重而見嫁母之猶應有服也余觀余正父之所辨貢士之妾母雖非父卒子幼而更嫁然無七出之罪而其去也有故則其實乃嫁母而非出

也樂平令尹所論之失正坐以嫁母為出母謂有服為
無服而正父之辨之也亦唯此二者之為急耳今乃獨
有是嫁母也之一言而不論其所以不為出而猶有服
者顧反題其篇端曰不養出母又但論其與古之出母
者不同而不可從於不喪之文則亦自相矛盾而反以
證成令尹之誤說矣予懼夫覽者之不能無疑故書此
以質焉

正父雖不能深明其不為出母然亦不敢正以
出母目之但篇末一處有不養出母字而自改

出字為生字亦可見其大指之
所在矣但少著力分明說破耳

抑正父之欲使夫人養

是母也將使如何而養之耶子聞之母嫁而子從者繼父為之築廟於家門之外使其子祀之而妻不敢與焉說者以為恩雖至親族已絕矣夫不可二故也此則是嫁母者生不可以入于廟死不可以祔于廟而亦不可以養於家矣為之子者率其婦子就母之家或舍其側而養之則於禮也其節矣乎或曰此為母之有家者言之則可矣不幸而無以為家則如之何築室於外可也

書張伯和詩詞後

右紫微舍人張伯和父所書其父子詩詞以見屬者讀之使人奮然有擒滅讐寇掃清中原之意淳熙庚子刻置南康軍之武觀以示文武吏士

跋徐騎省所篆項王亭賦後

騎省自言晚乃得闕匾法今觀此卷縱橫放逸無毫髮姿媚意態其為老筆亡疑淳熙辛丑仲冬乙酉新安朱熹觀汪伯時所藏於西安浮石舟中

跋蘭亭敘

觀王順伯袁起巖論蘭亭序如尤延之著語猶未免有
疑論余乃安敢復措說於其間但味務觀之言亦復慨
然有楚囚之歎耳朱熹

跋汪季路所藏其外祖湍石喻公所書文中子
言行卷後

玉泉喻公手書王文中子言行以授其外孫其可謂不
言之教矣後學朱熹敬觀淳熙壬寅十二月庚申

跋泰山秦篆譜

乾道丁亥予訪張敬夫於長沙一日相與謁劉子駒又
閱其先世所藏法書古刻及近世諸公往來書帖竟日
不能徧因出泰山秦篆譜曰此雖墨本然舊藏僅存此
紙頃歲有欲取以入石者顧手澤所在不忍壞遂已獨
學易養性二篇乃重刻本因取以見遺予受藏之後累
年乃得篆譜新本於汪季路不知其何從得本以刻也
因合二書通為一卷追省前事如宿昔也劉丈多聞彊
記清貧苦節少仕州縣遇熙豐故家子孫輒引避餽粥

不繼或憊卧終日而處之泰然相見時已老尚能談說
往事滾滾不休氣貌醇古自然有前輩風度今不復有
斯人矣去歲守潭俯仰昔游幾閱一世劉丈與敬夫逝
去皆已久而劉氏子姝無欲無咎獨能閉門忍窮謹守
家法又足令人感慨太息云明年慶元改號歲在乙卯
五月丁未病中讀養性語因記其後

跋蔡藻筆後

蔡藻造筆能書者識之此故沅州呂使君語也因試其

所製棗心樣喜方老而益精并深山陽鄰笛之感慶元
丙辰冬至前五日晦翁書

題袁機仲所校參同契後

予頃年經行順昌憩篔簹鋪見有題煌煌靈芝一年三
秀予獨何為有志不就之語於壁間者三復其詞而悲
之不知題者何人適與予意會也慶元丁巳八月七日
再過其處舊題固不復見而屈指歲月忽忽餘四十年
此志真不就矣道間偶讀此書并感前事戲題絕句鼎

鼎百年能幾時靈芝三秀欲何為金丹歲晚無消息重
歎貧當壁上詩晦翁

跋周益公楊誠齋送甘叔懷詩文卷後

退傅精勤小物無有入於無間老監縱橫妙用諸相即
是非相且道二公用處是同是別叔懷於此卷中直下
薦得不妨奇特如或未然待汝一口吸盡西江水即向
汝道慶元己未四月甲申朱熹

跋陳剛中帖

陳剛中詩諸公跋語已具見其顛末周君季宏特以示
余使題於後顧熹復何能有所發明但計紹興庚申距
今己未六甲五子適一周矣胡陳雖死尚有生氣而彼
紛紛者果安在哉嗟嘆不足姑竊識其左方十月甲子
雲谷老人朱熹書

記遊南康廬山

晦翁與程正思丁復之黃直卿俱來覽觀江山之勝樂
之忘歸時淳熙己亥重午日翁子在甥魏恪侍行

書濂溪光風霽月亭


淳熙八年歲在辛丑夏四月六日後學朱熹張揚卿王
沅周頤林用中陳祖永許子春王翰余隅陳士直張彥
先黃榦敬再拜于濂溪先生書堂下惟先生承天畀系
道統所以建端垂緒啓佑于我後之人者厥初固不在
斯堂用咸歎慕低回弗忍去熹乃復出所誦說先生太
極圖贊其義以曉衆咸曰休哉退先生之曾孫正卿彥
卿玄孫濤設饌光風霽月亭祀真卿吳蕪善僧志南與

喜敬書以誌

遊密菴記

淳熙辛丑秋七月癸未朱仲晦父劉彥集敬父平父黃
德遠方伯休陳彥忠來遊密菴仲晦父之子塾在彥集
之子瑾平父子姪學雅學文學古學博學表侍向夕冒
大雨涉重澗登晝寒亭觀瀑布壯甚明日仲晦父復與
彥集平父步自野鶴亭下尋澗底得水石佳處三四規
築亭以臨之而陳力就深父繼至見之欣然許相其役

遂復登晝寒會雨小霽日光璀璨尤覺雄麗歸飲清湍
以崇山峻嶺茂林脩竹清流激湍映帶左右分韻賦詩
明日復循澗疏理泉石飲罷而還道人宗慧宗歸有約
不至



晦庵集卷八十四